

公牘鱗爪
三

呈為呈請訓示祇遵事案查疊奉

憲台訓令開以振興實業為當今之要務創辦森林為必要之急圖知事於本年一月成立林務總分會負

請進行陳於

清明值樹節期恭率僚掾暨學商各界在於縣城各隙地暨小教場播種洋槐及桐橡籽核並雜值白楊榆柳開渠引水創設模範林為全縣倡以及西大路官柳殘缺之處陸續栽值楊柳一萬五株已經成活五千一百餘株伏查植樹一事運栽維艱灌溉不易雨水又缺成活更難必待

年餘枝葉成陰庇其本根方收效果不謂中途生長期間

輒被無知愚民縱豕嚙傷樹根或縱車撞折中斷

知事

嚴令禁止有犯必懲民知禁令相戒不犯惟靜邑為東西
通衢行旅往來絡繹於途不體植樹艱難隨意車轂擊
斷或撥作炊薪及各區巡警及林務會員目覩向前查問
輕則詈罵重則拳擊迨經報縣該客已去無從查究莫可
誰何居民損林苗依法懲治客官傷樹熟視無事此等
下情若不先定辦法實於森林前途大有障礙一旦社會玩

視禁令林政萬難起色擬懇

憲台
帥憲

俯賜允准會銜出示張貼示衆俾知警惕再定行客車馬傷樹准由縣公署予以達令罰法之懲罰以肅禁令通令東西大道各縣遵照辦理以重林政而遂長養知事為保護官樹起見是否有當伏候

訓示祇遵所有呈懇會銜示禁行客傷樹予以懲罰各緣由理合具文呈請

即憲
憲台

鑒核訓示祇遵謹呈

甘肅省長兼督軍張

甘肅大林區羅

呈為呈請核准立案事案查縣署東邊有舊典史衙門

一座及前清馬號雖列入公產官產項下實已坍塌盡淨鞠

為茂草價值昂高無人過問擬請暫借此地創設農業試

驗內場闢治成畦栽植桑麻及他種外來蔬穀一俟有人承

購再行退讓以重公產如蒙

允准立案再由知事設法籌款繚以周垣去其瓦礫今冬墾
熟土壤明春播種籽核以仰副期

廳憲大人利用厚生興農富國之至意所有呈請立案暫
借公產創設農業內場各緣由理合具文呈明

廳長俯賜鑒核指令遵行謹呈

甘肅全省實業廳廳長司徒

呈為呈請恩獎給以資鼓勵事竊維通商惠工歐陸坐致

富強生寡食衆華夏日趨貧弱邇年來國內多故智
勇俱困於奔馳實業不興國民交受其影響龐僻西陲
仰伏

威福三邊之烽燧不驚四境之蒼赤樂業頻頒振興工商
之令疊示種植桑棉之法凡屬吏民沐浴

德化成奮企業之圖上副

養民之念知事承乏隴干勉竭駕下因民所利研究職
業一年以來粗成數種一植桑養蠶此地有桑無蠶不

知絲利遂選購蠶種指導飼養繅絲之法令民間有桑
之家先行試養以資提倡出絲不多質尚細軟並令多植
桑秧用便推廣一種棉織布此地山高寒重八月飛霜陝
棉畏冷移植不宜此次奉發爰棉先由農場依法試種現
出苗茁壯如能耐寒結桃自可播種興利惟布貴民貧
衣不蔽體陝棉易購織布無人先行籌款設立光華織布廠
教民織布內分二部一用改良機以洋紗織細布一用舊機以
紡線織老布究之紡線織布尚易倣行洋紗缺乏不能持久

現在民間紡織漸次增多機聲軋々村閭時聞布廠辦有
頭緒即行招商承辦一開採煤礦此地山童薪桂火食為艱
再過數年隴山濯々無薪為炊勢難安處靜民痛苦莫此
為甚爰跋涉探鑛發現煤苗首出巨資集股開採煤苗已
現山水不涸雖未採取民已安心一創植農物此地農田
彌望只植菽麥歲稔穀賤衆庶咨嗟宜創植他項之農
品既增穀價又闢利源更足以調和地力易滋發育如西
藏之紅花可供藥品美國之玉黍可浥佳釀南省之諸芋

可增食品川蜀之桐椽可造油色均已創種尚能生長將來
如能成熟必可利民以上四端雖提倡試辦已有端倪未收大
效之情形也一創造毛絨線衣服龐上為羊毛產地價廉
貨美毡衣費毛粗重難服由女士毛琬瑩研究發明去垢
紡毛各方法並造成衣袴帽襪各毛編物品因未目覩外人
成品式形不完鄉民服用亦甚適體已令其傳授民間婦
孺以資推廣庶毛衣可補布衣之缺村婦能造無布之衣
家庭童稚隆冬不至號寒市井商販携布難施壟斷一

創造手工棉線物品棉花為陝鄰產物購買不難女校手工
商場貨品均需棉質手工線以資編造此線來自東洋不知
如何製造茲由毛女士由紡織布棉線時創造此項手工棉線
雖光澤稍遜編物適用已令其傳授民間婦孺依法紡製
發達國貨一倣造棉質洋頭繩近年歐戰擾攘此次東洋頭
繩貨少價昂不止五倍茲由毛女士用棉質紡造東洋頭繩
因無機器出自手工雖不寬鬆頗能耐用並用之編成衣
袴各種物品亦能與毛編物品並駕齊驅已令其傳授民

間婦孺學習倣造挽回利權一創造通用石筆石筆一物雖
屬微末當此振興教育之時消費陡增全屬舶來之物茲由毛
女士採用此地所產白土製成石筆質雖不堅用尚省力已令傳
授民間採土造作將來研究合法亦可稍減外貨之輸入以上
四端雖未大收效果已有成績可觀俱屬創造之情形也茲
謹呈毛編衣一件棉編小袴一件棉線手工一件去垢駝毛羊
毛各一色駝毛線一束蠶絲二色石筆五枝羊毛線一束手工
線一束倣造頭繩三組恭呈

鈞誨知事 職責攸關自應盡力提倡以仰副

即廳憲振興邊業利用厚生之至意不敢仰邀勸業之獎勵

該女士苦心孤詣為民興利實屬有功藝術人所難能當
此西陲風氣初開興業正切之時合無仰懇

帥廳憲俯賜成全依褒揚條例逾格優獎或依勸業條例

獎給部章以昭激勸而興實業之處伏候

鈞示祇遵所有呈請給獎創造毛棉線物品毛女士以昭激
勵各緣由理合具文呈請

即
廳憲大人俯賜鑒核指令遵行謹呈

甘肅省長兼督軍張

甘肅全省實業廳長司徒

呈為呈請核示遵行事案奉

廳長訓令更換磨帖發下乙丙兩種及增課數目飭令征收
等因到縣當派科員馳赴各鎮溯河而上依次清查從前
隱磨全數畢露共計查得水磨百十座磨戶紛紛來

縣顧懇不換其原因以增課大多十倍有餘無力繳納不敢
換帖知事再回開導以全省公令所在一縣何能獨異令先換
帖再調查渠水磨利情形果有空碍之處再行呈請

廳憲量予減等以蘇民困幾經開導方始承換計已換齊
一俟帖費繳清即行另文呈解外茲將節經查明磨戶困苦
不能擔任重課寔情為我

廳憲一陳之靜甯居羣山之中境無大河只有縣之東南山
中出有小河兩道至水洛城合流因生齒日繁無業可圖

除農人外卽立磨為生每立一磨草屋一間小者三四十串大者百餘串文遂將一河之水分作四渠沿渠立磨五百數十座而此河水源並非山泉涓涓不息河身又係沙底不能蓄水每因夏潦則盛漲泛溢秋冬則雨少水涸夏時雨足四渠並轉雨缺輪流停轉若秋冬河乾竟成十分之七名雖水磨寔則枯磨較之黃河洮河沿岸水磨大有天淵之別此河小渠多磨多停轉之不能增課寔情也一關狄各處水磨上越行銷既廣利金亦鉅有磨一座卽成富室此地交通不便均在山中來磨

者俱屬山民有驢馬者自行轉磨為磨戶者不過守一磨為糊口計磨麩三斗抽麩一升隨取隨吃再不給錢如無人力之磨戶將磨租人每年得錢五六串至多十餘串文磨多水少停多轉少無利可贏故爭水訟案絡繹不絕磨利未覩磨害立見若照新章每年科以四元磨課萬難如數繳納此磨無大利磨戶極貧之不能增課實情也一磨戶從前雖分中下實則中下者其名不同完課則均以每磨每年出錢六百文為限今新章定乙丙等以代中下名目昔之出錢六百文者今則乙等每年出洋四元以現時二串二百

折洋一元計算較之上年增加十三倍之多前之同出六百者今又多一
少增加之多駭人聽聞民力已竭萬難担負若必實行鄉愚無知
定至激生事端或全停抗課比舊日磨雖分等課則一律令忽多
少不一猛增太巨之不能增課實形也一從前無力出磨課之戶
悉多兩家出一磨課或匿不領帖此次沿河沿渠一查前之匿磨
全行搜出均須領帖照章納課實則前之出六百文無力者全責
令出四元或二元能辦到乎前之共出一磨只六百者今責令各
出四元或二元之課能辦到乎此磨無隱匿民實貧困之不能增

課實情也以上四端均經知事再四偵查明確毫無諱飭之實在原因

當茲軍餉浩繁羅掘無術稍有一綫籌款之際無不竭盡聚斂之

力稱貸於民猶且應募况應出之磨課乎惟是增課太多分等

又異形格勢禁民力難支與其釀事無益於後不若設法變通於

前知事再四思維擬於靜甯各磨全係山中小磨靠雨為生者

一律改為丙等以符當日同一之稅則而課稅仍增五倍不止本年

又出帖費一次於公於民兩有裨益再此次換帖派員下鄉收款已逾

四月困難萬分甫繳帖費又出磨課如不稍予變通減作丙等

本年磨課萬難收集下情如此迫而上陳仰維

廳憲痼瘕在抱體恤民艱應如何減免以蘇困苦而重課稅之處
伏候

訓示祇遵所有山磨無利增課大重民力已竭無法担任各緣由
理合具文呈明

廳長俯賜電鑒核准減作丙等以裕民生謹呈

代行財政廳廳長齊

呈為呈覆亦遵事案奉

憲台令開整頓社糧用垂久遠一案除原文請免冗叙外尾開
仰該知事恪遵省令按照條規內開各節妥速認真辦理其已
辦者益加整頓須將從前社正副侵蝕虧欠有借無還等弊極
力祛除未辦者趕即設法創興仍將辦理情形據實呈報聽
候派員查覆切切此令等因奉此遵查知事六年冬初蒞斯土
正值數年災後之餘詢問痛苦民食為艱首由整頓社倉入
手當即查明靜邑原有社糧共計七千三百四十餘石分存城

鎮由社正副經理每年由紳耆舉報社正副一次依例春放秋收
實則民國以來牧民者未暇及此經理者百弊叢生或倉廩
坍塌或倉穀朽霉或為社正副侵蝕殆盡或為極貧戶食後
難還一經調查名存實亡當即嚴令追賠還倉恢復原狀然疲
玩已久仍難咄嗟立致計繕葺城鄉倉廩八處繳足原數二十五
鎮尚有二十三處倉廩尚未修理完好外欠糧一千八百餘石尚
未交齊正催辦間上年夏間又奉

省長疊令切實整頓社糧訂發條規到縣復經

知事

通行農

會及城鄉紳耆並社正副遵照辦理在案上年旱潦不均
收成稍歉然因前數年旱荒過甚雖秋成大有穀賤傷
農又償荒債實屬元氣未復民力難支由知事再四開
導強逼上年城鄉各鎮又共捐積社糧二百石呈報

省長奉令核准以重儲峙亦在案茲奉

訓令當即傳集學紳商農各界宣布德意咸深感激如
獲二天惟是本年收成更不及上年之秋稔緣春麥逢
早秋春遇霜蕪以短期公債及借餉均係普及應募農

民力竭實難捐積社糧卅年來名雖追遠原額七千三百
餘石實則如同新捐兼之每鎮修理倉廩山鄉運糧交納
所費亦不鮮少全出農民非異人任故除上年捐積二百
石外本年實難再捐此實在下情也 知事 擬在派員分赴

四鄉將原額一律催收齊全倉廩一律修繕堅牢社正副律
更換正直富有之家担任經理計全縣有社糧七千五百餘
石亦足有恃無恐可以備餽糧救荒歟矣仍不時由 知事
派員抽查情狀予以賞罰總期社倉儲積不至朽空緩

急有實惠及民之效平日無奉行故事之習以仰副

憲台整頓社穀備預不虞之至意是否有當伏候

訓示祇遵所有遵令呈明辦理社倉各緣由理合具文呈請
憲台大人俯賜鑒核指令遵行謹呈

甘肅逕原道道尹歐陽

呈為遵令呈覆懇祈獎勵事案奉

帥憲訓令開獎勵植樹以重林政一案原文有案請免重叙

外尾開合行令仰該知事刻即撰擬切實佈告董勸人民認
真栽植仍將示稿及遵辦情形先行具覆以憑查考勿得
視為具文此令等因奉此知事遵查林政周設專官 森林各

國利藪古今中西均甚注重甘肅曠土尚多游民亦衆山童
野赤林務廢弛知斫伐不知培植有公令未有實行土厚水
深樹木能增雨量人稠炭缺枝葉可當炊薪

帥憲疊令提倡語誠再三凡屬吏民均感

德意 知事 自上年蒞任後於清明節舉行植樹恭率僚

掾暨學商各界植樹西郊以開風氣又於禁煙親赴四鄉
時復行傳集紳農勸導植樹並出示保護竊伐以培利源
計城鄉各鎮栽植甚多誠恐首次試辦缺水灌溉不能成活
故未敢即行呈明隨入購得造林洋槐籽種萬顆並桐橡
籽各樣領得造林須知一書先令林會士紳研究嗣於本年
一月一日成立全縣林務會設有正副會長及會員多名為全
縣整頓林務之總機關積極進行再分區設立分會以資推
廣種植並擇定城內公共隙地五處由知事籌款四百串文

作為造林經費先於隙地購運白楊榆柳五千株造成小
模範林為各鄉所取法又於文昌宮後隙地依法播種洋槐
萬顆並桐椽等樹為雛形之苗圃如能成活再將樹秧推
栽各鄉以廣樹藝至東西大道樹株亦令補栽完密以蔭行
旅惟植樹尚易灌溉實難雨澤愆期枝枯葉稿知事訪
聞城東舊有溉地渠道年久閼塞中間渠身依傍於崖崖
崩流斷農民苦之遂即單騎親勘窮源竟委擬由水地農
戶醵資疏濬修壩山源防其沖決另開直渠暢其流行無

崖崩渠斷之虞有流長溉多之益計一興修間費錢不及百緡下
流可多溉地數百畝昔之旱地今則沃壤矣又於城隅引小流入
城中分溉植樹各地一勞永逸不畏燠旱地可灌溉樹可成活矣
至鄉間東南分區各鎮連年植活白楊榆柳不下數萬株如
能年年增加十年之後材木不可勝用炊薪不至難求裨
益民生殊非淺鮮此次奉到

訓令當即出示優獎辦法各界歡悅咸沐

恩澤益知造林為當今急務更可踴躍從事以仰副

帥憲利用厚生注重林政之至意知事伏思此次植樹開渠
在事出力各員不無微勞足錄以及居鄉提倡紳士栽活十株
以上者不有獎勵風氣難開擬懇

帥恩所有督修渠道造林植樹在事出力之第一科科員毛
武超林務會正副會長王俊臣李秀巖楊芳林擬請各給二
等銀色獎章一面章麻鎮紳士秦繼周係栽活十株以上者
擬請給予三等藍色獎章一面以昭激勸而開風氣是否
有當伏候

鈞示祇遵除林務會前已呈明大林區署立案外所有會章示
稿遵令呈賞並懇祈獎勵以開風氣各緣由理合具文呈請
帥憲俯賜鑒核訓示祇遵謹呈

甘肅省長兼署督軍張

呈為呈請解釋事竊查有甲乙丙丁四弟兄於光緒十四
年分家田房四股均分外有小舖房及貨帳未分甲與丙
分單後批明某舖房及貨賬某乙承應兩單同樣批文只

甲單書甲名乙單書乙名細察實係當日一人筆跡並非
後來偽書乙與丁分單無此字樣據云當日乙與丁另有老
舖抵補云甲與丙分單既有同樣批文却無平分各半字樣
且自光緒十四年分後甲將舖事經理並承還賬項千餘串
文丙則始終未經理舖事亦未向甲索過共有一半舖賬嗣
甲與丙不睦屢起訟端丙從未一索此共有一半不動產上年
冬甲老死本年夏丙由鄉來城索分此一半舖房甲之子言
無丙份丙執分單索要爭鬧不休於此案有二說焉甲說

不動產以分單為憑應照分單給丙一半其甲償還各債算
明由甲與丙同担分還焉乙說分家已三十餘年丙概不過問
此不動產豈能無故今由甲管業三十餘年不能再與丙平分
即令甲侵佔其起訴時效業已消滅况分單係同樣批文並
無平分各半字樣分單又為丙之父所為當日有無含糊
誰能知覺不能再與丙斷分一半 知事 詳訪當日甲丙平
分此物平分時房不值錢欠債甚鉅丙之父見此光景
棄而不顧揣其用意避禍不沾染也不料三十餘年之後

院價高昂又因甲死丙執分單始索此一半不動產圖得利
耳似此情形究應依上甲乙何說判決方符法理案懸待判合
無仰懇

廳長俯賜鑒核指示遵行謹呈

高等第一審判分廳廳長魏

呈為呈請解釋事竊查有甲乙丙丁人丙當獲丁之產業
甲受人教唆買丁之產以奪丙之當利如價不能足有乙願借

錢若干買得此產依習慣甲未償清欠乙債務之前其產利息甲乙各半不付債利此民事習慣也其實際甲為獨有所有權之人乙祇為債權人每每強豪居乙之地位鄉愚居甲之地位與強豪有隙者居丙之地位甲受乙之玩弄奪丙之當業是乙始得洩忿於丙繼則謀奪甲之業為己業故往往甲得業二三年後乙即以利息平分為所有權共有之根據興訟拖累甲本窶人又畏其勢遂將獨有產為乙所奪去此為鄉紳土豪陷害良懦之夜爾鄉愚每受其害無所訴

告茲有如上述情形乙以共有產起訴到案以契約証明係
獨有業訴明實同前情若不嚴懲良懦受害永無昭雪之
日自應斷業歸甲獨有令甲償還乙之債務乙以欺罔欲使
人將所有物交付於己未能達到目的是否成立刑律詐財
未遂罪合無仰懇

廳長俯賜訓示解釋遵行謹呈

高等檢察分廳廳長劉

呈明設立興仁講學社文

呈為呈請訓示遵行事伏思牧民為政在美風俗欲美風俗在正人心欲正人心在講聖道以故昔之牧令徵聘耆宿置設講院講明聖學用正人心意至美也況今海通以來東西文明日益接觸融化新舊之見漸泯町畦國學之粹恐全捐棄西俗之惡能盡則微是宜自有主張取長補短耳

昧於國學

知事讀書未成毫無如覺謹就窺測所及竊以為人受天地

之中以生天賦人之德即天理也在天謂之理在人謂之德在事謂之義克治形氣之私恢復本性之善非講學無

以明其理非明理無以善其行是聖道即人道也人道即天道也亦即世俗所謂精神文明也地無東西人無黃白凡含生之倫能舍此人道以生於兩大間乎不能也故中國秦漢帝制而後日趨於精神文明一方面而忽中古物質文明於不顧西國法美鼎革而後日趨於物質文明一方面而置古代哲學神學於不講遂醞釀以成今日東西兩大文明之特質以對峙於宇宙間海通以來東文明西渡西文明東漸是為兩大文明接觸孕育一種不東不西非新非舊之

大文明之時期此大文明產生後必有以光明世界利濟羣生矣
是中國當益發揮光大固有之精神文明以接受東漸之物
質文明所謂道德為本藝術為用缺一不可且不可反用為
本於利用厚生之中仍寓制慾復禮之道講學社之設不
容緩矣西國當益發揮光大固有之物質文明以接受西
渡之精神文明所謂衣食既足禮義須興亦缺一不可且不
可用欲勝理故自歐戰告終聯盟出現舍爭地爭城之野
戰行講仁講讓之公理其衣服食一切均予限制亦制欲

循理之見端也。况其學者士夫又多鼓吹孔孟學說，傳述東方道德之精神。文明較之中國學者，鼓吹職業學說，傳述西方科學之物質文明，有過之無不及。此未來東西融合之文明，孰先產出焉？均於是植其胚胎矣。且邇來國人誤認不法之自由與自私之權利，及縱慾之奢用，為歐化一倡百和，習非成是，以致生產力不進，生活費日增，舊道德式微，新幸福不覩，詐偽成風，人心陷溺，更非講明聖道，挽回人心，不可終日而訓農惠工，開闢利源，尚其次也。知事擬

創辦卷正 蒙卷園

於勸學所內附設興仁講學社敦聘在籍前四川即用知縣省會
議員王曜南前四川即用知縣孫積善前慶陽府教諭舉人柳
逢源歲貢張蔚豐前西固縣知事優貢李震乙為社師此五
人者均係耆年宿德孝友躬行沈酣典籍鄉望允孚以之主
講實能勝任再由知事依紫陽白鹿洞及安定湖學之規講
論孟五經大旨分經義治事兩齋釐定規儀用資遵守設社長
一員主持一切暫由知事兼代一俟成立即舉替人俾青年學子
及域內士夫為德性之陶鎔瞻宮牆之美備此興仁講學社之所

由設立也講明聖道啓覺後生人心風俗繫焉知事承之是邑
不敢不勉又邑中人士咸樂醵資擬明春於城南五台山隈建一洗
心亭俾邑人游覽登眺之餘發洗心滌慮之思用去污染一暢新
機以上各端是否可行伏祈

訓示祇遵所有呈明擬設興仁講學社聘宿儒講性理以美
風俗正人心各緣由理合具文呈請

帥 尹憲俯賜鑒核訓示遵行謹呈

甘肅省長兼督軍張
汪原道道尹歐陽

批警佐劉棟

所呈清潔各辦法具見注重公共衛生能盡警察職責殊堪嘉許應先將該警佐記大功一次以示優異所稱清道夫一節前經本所長面諭李警佐將街中乞丐調查擇其年輕游手者令充此役其費由所丁三等警項下劃出又於大街接連巷口內酌置便缸先將照壁前違警小便者從重處罰以肅風紀又垃圾二字係日本名詞中人多不解此應易為穢屑箱太平水桶大街少置幾座因非商埠火災尚少蔬場集於大街為

北人習慣挪移初不易行前定奉將署照牆前後為蔬塲
後因勸學所標買能否~~裁~~^修之前暫為假用仰與武所長妥
商可也又造粉茶戶不將豆水傾於後院必傾於前街夏則腐
臭釀疫冬則冰滑妨行更宜禁止以去污習併仰注意可也

此令

呈為遵令呈報事竊查上月念間

憲台啓戟遙臨以道路未能平治跋險涉涸行旅艱難為慮
面諭知事將縣屬東西道途坍塌處所迅速派員逐一確切

查明繪圖貼說估工呈明核辦等因奉此知事遵即委派第一科
科員毛武超率同錄事王覲文等馳赴東西大道逐細勘查應
修橋梁狹路繪圖呈覆以憑核轉去後旋據該員毛武超等呈
稱自司家橋云云是否有當理合呈覆鑒核附賞勘估補修
東西大道圖一張等情據此知事正在復勘詳估尚未具文呈
覆間八月二十日復奉

憲台訓令同前因遵查卑縣本年夏潦一至水山暴發致將東
西道路冲蕩崩裂陵岸變遷車難方軌行人裹足知事隨時

派警諭紳沿途修復以利行旅不意陰曆七月一日忽秋雨連
朝溢冲過猛復將縣東二十里司家橋地方原有橋樑全行被
水淹沒幸溪身狹淺雖無橋樑車騎可行車軌莫達入縣西
八里鋪地方其溪兩岸污泥閹塞既乏橋樑往來甚碍 知事已
派遣專員分道出發先將司家橋小溪先畀巨石鋪墊可行
及將八里鋪之河兩岸閹泥掘去鋤取該處土培補不隕行車
以及其他山川道路冲壞崩頽險峻難行之處闢治廣坦以利
跋涉外究之未能根本修治一勞永逸實非持久之計既經該

員勘估補修道路需費工料近在千串以外除知事復勘無異應
由司家橋上峽口八里河祁家大山四處動工興修其餘路途由知事
籌款設法補葺以期平坦如蒙

允准籌撥專款尅期舉行知事職責攸關勉竭駕下督率

僚掾工匠實力修理省費堅工地平道坦化險為夷以仰副

憲台平治大道利濟行旅之至意所有先後奉令勘查過縣屬
東西大道修理處所及估計需款各數目各緣由理合具文呈請
憲台俯賜鑒核指令遵行謹呈

涇原道尹歐陽

呈為呈覆事八年十月五日奉

憲台令開案查修治官路入全文等因奉此遵查本年九月

十五日奉

憲台指令開呈暨圖說閱悉所擬農暇諭令紳約分段補
修一節事屬可行之畢具報等因知事奉令後即諭飭東
西大道紳約趁秋收農隙各按地段督率民夫迅將上峽

口祁家山兩處並其他道路先行遵令一律補修疏濬免滯
行人工竣將所修地點呈縣轉報月餘之久未據該紳約等

呈報前來

知事

復派錄事王覲文親往查勘東西道路上峽口

祁家山兩處及其他應補修路途是否修葺鞏固據實呈

詳

覆以憑轉報去後旋據該錄事呈稱東路轄境僅只二里
之遙所有上峽口小澗業已修葺平坦行人暢達惟司家橋
橋樑工程浩大應俟咨商籌有巨款方可舉行現值冬令
水涸不碍往來明春修補亦不甚遲至西路一帶西河原有橋

樑朽壞不堪現已從新修築甚屬完固視其料堅十年外
不至傾廢至祁家大山險窄之處已由該紳約籌派夫掘開
山邊進佔五尺有餘道路現已寬濶行旅定無妨碍又八里河
水涸尚可涉行若修橋梁需工浩大仍俟咨商妥協再行興
修遵將查勘過東西道路之祁家山上峽口兩處業已補修完
固又其餘路道均早修築平坦各情呈請鑒核等情前來
知事復查無異西路之祁家山邊狹路東路之上峽口小澗兩處
寔已遵照 前令修掘平坦至八里河及司家橋兩處橋樑工

大費鉅前次業已呈明非俟將來籌有的款碍難動工在案茲奉
前因理合將祁家山及上峽口兩處業已修補竣工實情及水冲各路
並新修西河橋樑各緣由理合具文呈明

憲台俯賜電鑒訓示核咨謹呈

涇原道道尹歐陽

呈為遵令呈覆事案奉 廳長訓令開實行任用法警一
案仍仰將改組整理情形隨時具報以憑查考切切此令等

因奉此知事遵查六年蒞任後因受理司法訴訟房差舞

弊苦害愚民數倍前清屢誡不悛當即遵章裁革以發

房書班差人役遴委書記員二員錄事五名承發吏六名司

法警察二十名檢驗吏二名改用司法民刑傳拘搜查各票標

檢

明膳宿費用曾經呈明 有長暨前 高等審判廳廳長

奉令核准實行各在案自茲實行以後迄今二載房書差役

淘汰殆盡數百年弊害一旦為之擴清至遣用法警又係

知事

開辦警察教練所畢業學警授過法警規則以之充任較為

守法不敢非為其從前各班總役十餘名挾官殃民予智自雄者
均因案法辦送監執行社會觀感為之丕變以期脫人民之疾苦顯
司法之精神仰副 廳長法治邊方登民社席之至意所有遵令呈
明七年度已實行政用法警法票改組辦理各情形理合具文呈
明 廳憲大人俯賜鑒核訓示祇遵謹呈

高等廳長 党

照得農會正會長天足會正會長醫學研究所所長江秉乙

老成持重望重梓鄉熱心公益勞瘁不辭倚畀方殷遽聞溘逝
傷悼之餘情曷能已除由本公署給予見義勇為匾額一方並派
書記員前往弔唁外應由各該會所詳查事實成績列冊呈縣以
便
賢呈請 省長給獎優卹以示尊重為民效力從公盡瘁職員
之至意合亟示仰該會所一體遵照切切此示

照得本行政長提倡在靜開辦中和火柴股份有限公司振興國
貨養活貧民敏活金融擴大商業前經照章呈明 實業廳長

批准咨部註冊在案茲值開始營業之時除分派專員赴川聘
匠往津購葯外凡各界人士有願投資入股者限自民國八年十二
月一日起至九年一月一日止繳清逾限截止不收合行牌示為此
示仰合邑各界人等一體知照毋誤切切特示

呈為呈請核示遵行事竊查靜甯同治兵燹以後人民逃亡土
地荒蕪當時善後章程招集流亡領照墾荒承糧為業每
照一張出費若干為善後辦公費迨後不知何年訛照費為

地價每垧出價數百文無非巧取民錢以飽囊橐歷有年所矣

知事

蒞任之翌年科中呈請給照繳價前來當以此項地價在

當日可辦善後事宜在今日何能收受只准給照不准取價正

擬宣布取消紳耆各界聞有此舉僉稱縣長既不收受此款

此係地方習慣民不出價反致滋擾况現在每年禁煙經費

教育經費以及現辦農林統計放足各要政在在需款攤於民

商若保存此項地價充作以上禁煙教育等事經費款集而

民不擾事舉而費不缺以公濟公各得其便等語 知事伏

思要政待舉經費無出與其攤派苛擾不如化私為公遂允所請照
舊收價甲價撥作學校基本金乙價撥作林務開辦費丙價充
作禁煙經費丁價充作統計公費每至半載收支列表宣布衆知以昭
核實惟地價有無不定用途分配難均茲集學商各界妥議每年
此項地價全作地方公用依十分勻攤教育費佔十分之三禁煙費佔十
分之三統計農場林務放足佔十分之一永為定例以便遵行計每年
多則十串少只數百串因此地人稠地狹早經開墾無荒故也以上所
擬地價歸公文配用途各節是否允洽可行伏候 訓示核准立案

飭遵以垂久遠所有呈請地價歸公支配用途核示備案遵行各
緣由理合具文理明 卽憲廳憲俯賜電鑒核准立案指令
遵行謹呈 教育廳 大帥 涇原道尹

再此項地價改名地方公益捐以符名實合併陳明

為宣布事案查靜甯同治兵燹後左文襄公來甘安撫招集流
亡各復本業其有不敢歸家之產業名為絕產一律準叛產章程
繳價領照承糧為業相沿至今歷經辦理在案本行政長蒞任之翌

年由辦學委員呈請發照價充學用前來當經本行政長面呈
高等審判廳長邵公承示民事採用習慣依舊領照價充公用
事尚可行不背法例所有地價收入分撥學校林務農場禁煙各經
費逐款宣布亦在案惟地價有限用途甚多若不明定支配辦法
立案實行殊不足資畫一而昭久遠前經本行政長專案呈明

教育廳長批准此項地價應改為公益捐於公有濟於民無傷應
准立案以垂久遠計支配各用途教育十分之三禁煙十分之三農務
林務統計誦演天足各十分之一等因到縣應自九年一月一日起此

支配規定實行一俟禁煙肅清再行撥歸農林誦演三項以資發展
除荒廢絕產廟產應遵教育行政會議一律充作學用以符定章外
合亟布告為此仰合縣各界人等一體遵照切切此布

呈為呈請核示立案事竊查縣城廢倉舊址廩室坍塌不堪歷
任因折徵無用棄置未理日災雨淋傾頽益甚現因設置養正
蒙養院擬援甯朔各縣成例請以此項廢倉院改建養正蒙養院
去其瓦礫栽植花卉繕葺廩室用充講舍俾天真爛漫之兒

童有修養優游之勝地庶免放浪嬉狂染社會之惡習以斂心性減
學校之訓練已由知事派人分赴津滬購備部定幼稚書籍及兒
童玩具多種以資應用並擬委師範女生袁錦鳳為貞靜高等
女校校長兼院長盡心訓迪糾正言行以期仰副 廳長蒙以

養正培植學基之期望合無仰懇 恩施轉呈 省長援例核
准立案以宏教育所有呈請援例准以倉院改建蒙養院核示立
案各緣由理合具文呈明 廳長俯賜核准訓示祇遵謹呈

教育廳 閻

呈為遵令呈覆事案奉 尹憲訓令開據 云 云 此令等因奉此 知

事遵查本案上年經縣民高壽山張文選等以浮收公債侵吞肥
已等情稟訴高攀桂李清憲台鼎臣李添林鄉約曾永富等
到縣當經出票傳訊該高壽山張文選等未俟高攀桂等到案
質訊後又以同一案情上訴 憲轅令飭發縣傳訊判結 知事 遵又
票傳質訊訊明該高攀桂即高高清台鼎臣李清獻勸辦四五二
年公債實有浮收情事並私領息銀侵吞不發因念事已日久

遂從寬判結斷將四五兩年債票並領用息銀交出發商會傳債戶
平均減領該李清猷等懇息免罪願出該鎮未收齊之八年內債
遂斷李清猷再出公債一百元台鼎臣再出公債一百元高攀桂再出
公債五十元並因該李清猷台鼎臣等領用公債息銀數年不發
依妨害內債懲罰令之規定判處李清猷罰金八十元台鼎臣罰金
四十元其李清添林鄉約曾永富等從寬免究當堂宣判該李清猷等
聲稱感恩不已均令限交其上年該李清猷等辦理短期公債之
浮收部分因債戶百餘人未能一一質證明確應俟派員查對明確

後再行判決以上各情又經知事於判案確定後呈明憲台核示奉令

照准亦在案不料該李清猷台鼎臣高攀桂等平日在鄉惡霸一方恃

其富力挾官殃民習為故常迨知事傳令交款除李清猷因地案未

能逃逸外其高攀桂台鼎臣拒不交款逃赴平涼上訴又經知事呈明

憲台鑒核令飭平涼縣拘解歸案未能拘獲李清猷亦在押潛逃各

在案該李清猷等逃避者一畏查明本年公債浮收又觸罪刑一恃刁

逃避不交判案債款也再查上年奉財政廳通令各縣辦理本省

短期公債如有溢額時即將溢額募債改充八年中央公債靜甯全

縣計溢額五百兩遂依此令改作中央公債呈明 財廳在案迨後該鎮

認募者及他鎮認募者催收不齊計短二百餘金該李清猷等當時希

圖免罪願認此款此所以斷令再出公款填補欠債之原因也又從前地

方辦理公債有名特別戶者即富戶也先令特別戶每家應募數百

兩餘款再由中戶擔任上年知事辦理公債時該李清猷台鼎臣家資

數十萬均從前特別戶也來署懇請取消特別戶名目仍由該李清

猷等多出公債餘歸中戶擔任當經允准去後不料該李清猷台

鼎臣等以從前每出數百金者此次只出二十兩其餘均強橫攤派數

于庄之數百居民雖極貧戶亦不得免故有只出數百文者有一馬
凌霄出言詰問即被拘拿此該鎮眾民羣起怒怨使出高壽山張文
選等稟^訴不休之原因也此次判令再出公債者一以平眾民之氣一
以寬該民之罪揆之法理仁至義盡豈料該民等刁惡成性前遵後
拒竟敢捏詞上訴顛倒黑白希圖聳聽不出債款其情節可惡无
為罕見再^{知事}一面判決一面仍呈財廳叙明案由呈明抵解已由
^{知事}墊解在案今收者只李清猷罰金十元公債五十元而已是該
李清猷等前以願出公債為脫罪之計嗣以逃避上訴為脫款之計

既使原訴人莫可誰何復令地方官代其解款似此奸民妨害國信若不提交法庭依法懲辦何以伸法紀而快人心再該民稟稱未發實收一節

查該鎮區域甚大一鎮分上中下三鎮募債將及二千當時債款指撥軍餉守提甚急隨交隨撥該鎮延抗糾葛最後清交故應移作中央公債者所以較他處多也省債發有寔收中央債票尚未發下無從

給與合併陳明除上年浮收公債查明如有浮收實情緝獲依法訊判外所有遵令呈明該高尚清即高攀桂等誣控上訴各緣由理合具文

呈明 戶憲俯賜鑒核訓示祇遵謹呈 涇原道道尹歐陽

呈為呈請核准遵行事竊查知事上年因整頓鄉約以祛積弊
等情呈明 省長暨前 尹憲馬先後批准令行下縣遵辦在
案惟於舉報規則及鄉約任事規則未能詳定辦法仍不足祛
宿弊而垂久遠茲復擬定規則十四條是否可行敬謹繕呈仰
祈 鈞示祇遵理合具文呈明 尹憲大人俯賜鑒核訓示祇遵
謹呈 涇原道道尹歐陽

登在事

附舉報鄉約規則十四條

一縣自治試辦章程未實行以前所有區長村長尚未設立向日鄉約暫應存留上年已由本知事呈明整頓鄉約各辦法已蒙 省長批准施行在案自應遵守以祛積弊

一每鎮設一鄉約正一鄉約副每庄設一庄約再不得多舉妄立名目該鄉約正副及庄約亦不得擅用地方以滋擾害(鄉約下用名地方)

一鄉約正副及庄約舉報時須全鎮或全庄過半數紳民公認其人公平正直方可舉報不得由一二紳民推保私人及無賴流氓充

當以重公務

一鎮鄉約正副及庄約應對於全鎮或全庄盡應盡之責任不得為

一二紳耆之走狗假公勢以報私忿欺良懦而腐社會

一鎮鄉約正副及庄約有左列資格者得舉充之

一文理粗通者

一確無嗜好者

一年在三十以上五十以下者

一性情平和事理通達者

一鎮鄉約正副及庄約有左列情事者不得舉充之

一曾判徒刑者

一有煙賭嗜好者

一曾充鄉約有劣跡者

一家道貧窮游惰無業者

一從前民人對於鄉約呈遞首詞於法不合除緊急事件以口頭報告外其餘婚姻田地事務准用報告單交鄉約查問如不能評處了結即送警區依法處結

一從前鄉約對於民刑訴訟一概受理殊屬違法嗣後凡違警區範圍內事件發生經民人報告鄉約者准其評處了息如關民刑訴訟就近呈送該處警區轉呈行政公署依法受理不得私擅干預司法訴訟以符法例

一命盜案發生時經受害人報告鄉約法警未至時鄉約應即

拘留真兇真盜以免逃匿如得賄放縱即按脫逃律治罪以昭炯戒

一鄉鎮鄉庄中有公正良善者及游惰無業者並嗜賭作賊者該鄉約正副及庄約每半年造冊呈報一次以資叅攷而施懲勸

一區長村長未設立以前所有鎮鄉約正副及庄約均歸該區警察駐在所或派出所管轄如有違法情事准即呈撤以杜苛擾

一舉報鎮鄉約正副及庄約時由該區警察駐在所或派出所巡官巡長到鎮會同紳耆查明合格公正之人舉報任事不得濫竽

充數

一每年陽曆二月報換一次如能勝任者准連舉一次推不得連任三次以示限制

一舉報紳耆應負連帶關係如舉報非人殃民債事情節較重者得予該紳耆以應得之懲戒處分以杜妄舉

一本規則如有未盡事宜應隨時增入之

一本規則係縣單行章程之一種應自奉令核准之日施行

吳金公布

照得房班之設清沿明制民國成立疊經明令頒布一律撤銷行政

公署改用科員雇員及行政警察司法公署改用書記員錄事及承發
吏司法警察通行遵照為國服務在案甘肅邊僻因循未改頃又奉

到省長 高檢廳長令文照章改用不得再令房差干預公文到署

查本縣蒞任之初即將兼理司法公署應設書記員錄事承發吏

司法警察一律由舊日書差內擇其勤能可靠者選充服務呈明

省長 高等審檢兩廳長核准亦在案茲奉前因除再將本行政公

署依法組織呈報外所有本行政公署照章委用科員會計員統計

員雇員糧差外無所謂從前房班名目也本兼理司法公署照章委

用書記員看守所長檢驗吏錄事承發吏司法警察外無所謂收發管押刑書快役名目也又所用員警均給薪金除照章由當事人給予送達費錄狀費膳宿費外更無所謂從前無名賄賂也自此次改組呈明後各該員警自應革面洗心痛除積習勤勉從公各奮前程但有不知自愛利令智昏遺誤要公教咳舞弊者一經察覺輕則革除重則法辦決不姑寬俾莠亂苗以肅紀綱至公訐私訐之當事人如不遵章給費希圖送賄自輕一經察覺與授同科分別治罪決不寬容當茲歲首特為布告悉去舊染咸與維新切切此布

呈為呈明示遵事案查前因縣屬西區高界兩鎮壤接會甯隆德
行旅往來時聞偷竊已呈明派二等巡官陳英培同巡長王鵬程分駐
高界兩鎮先由清查戶口捕緝賊盜入手在案該巡長等分駐兩月以
來道路安謐行人不驚捕查尚屬出力茲查縣屬東區通邊焦韓
等五鎮深山大谷逼近沂隴又與華亭化平秦安隆德四縣毘連每值冬
令賊盜時聞閭閻不能安枕游匪得以勾留知事蒞任之翌年廉得其
故設法破其山中巢穴擒厥渠魁置之於法大為斂跡兩載安居今

冬秦中平靜游民漸歸東境居民時遭肱_監除將因案獲賊法辦

外擬調該西區二等巡官陳英培移駐東區以資緝捕而安村間其從

暫令

前派駐之巡長孫長林隨同捕緝容即另派巡長陳有榮移駐區

高家堡巡長高炳培移駐界石鎮與會甯會哨巡查以資保衛丹

靜甯東南轄境遼濶外連七縣內邑莊浪蕪以照章蕪任司法警察之

職務訟獄繁興奔馳無暇遙村僻鎮足跡難周擬再招用預備巡警

二十名暫由違警罰金項下開支火食以資驅遣如蒙 鈞示俞允將來

即抽派一等巡警六名於四區之遙村僻鎮輪流巡查庶警察裨益民生

之效力得以普遍全境而智詐愚強暴寡之鄉村惡習得以退處於無
權並能於禁煙各項前途裨益實多以期仰副 處憲整頓警政移
風易俗之至意所有呈明調移巡官巡長各員專責以資緝捕而衛
閭閻各緣由是否允洽理合具文呈請

處憲俯賜鑒核訓示祇遵謹呈

簡任全省警務處處長鄭

指令保衛團團總

照得冬令防務喫緊自應加意稽巡仰該團總督率團丁稽查西門以期嚴
密所有東南二門歸警察所負責又團丁服裝多不整齊應由該團總
會同經費局長妥議製備辦法並可先由本團製辦若干件再勸導
商家自行製辦若干件以壯觀瞻而重團務併仰遵照籌辦切切此

令

呈為呈請給獎鼓勵事案查民國七年春因陝鄰不靖靜境密邇
汧隴恐有竄擾闖入貽害地方情事曾經知事會同紳商各界在縣
城遵章籌辦保衛團以輔警力之不逮當由知事仿照地方保衛團
條例擬具施行細則呈明

帥憲核准在案奉批之下知事遵即照章遴委團總一員經費局局
長一員教練一員並由該團總遴選保董牌甲各長多名呈由知事分
別委充亦在案自七年四月一日設局開辦先由清查戶口嚴稽匪類

入手除未成年及家無次丁老弱殘廢因事不能服務等人不許編入
名冊外其餘各戶擇其年力精壯者編列十戶為一牌置牌長一人十
牌為一甲置甲長一人五甲為一保置保董一人每逢三六九日令其各
帶團丁齊集團局教授槍法講演設團之主旨俾團丁各明出入相
友守望相助之義訓練事畢仍令各安生業並擇派保董二人牌長一
團丁十名常川駐局以盡職務而便指揮除團總保董牌甲各長均係
名譽職遵章不支薪金外其團丁十名每月發給口食令其協助警

察輪流梭巡以清盜源而安善良服務以來迄今二載有餘幸辦理
微著成效因之閭閻安堵盜賊斂跡暇日無事並令修治城垣查禁
裏足保護林樹料理農場均能盡心竭力不無微勞可錄所有在事
之團總局長教練保董等員實在異常出力冰天雪地兩載冬防
昕夕從公純盡義務若不呈明仰懇

帥恩給予獎章不足以昭激勸而勵將來理合開具職銜名單一紙

具文呈請

大帥俯賜鑒核訓示給獎以昭激勸謹呈

